

## Les 5 - Openbaring 5

### Oopmaak van die boekrol

**5**<sup>1</sup> Ek het in die regterhand van Hom wat op die troon sit 'n boekrol gesien, aan die binnekant en die buitekant vol geskryf, en met sewe seëls goed verseël. <sup>2</sup> Ek het ook 'n sterk engel gesien, wat met 'n harde stem uitroep: “Wie is waardig om die boekrol oop te maak en die seëls daarvan te breek?” <sup>3</sup> Niemand – nie in die hemel, nie op die aarde, nie onder die aarde – was egter in staat om die boekrol oop te maak of daarin te kyk nie. <sup>4</sup> Ek het baie gehuil, omdat daar niemand gevind kon word wat waardig is om die boekrol oop te maak of daarin te kyk nie. <sup>5</sup> Toe sê een van die ouderlinge vir my: “Hou op huil! Kyk, die Leeu uit die stam van Juda, die wortel van Dawid, het oorwin, sodat Hy die boekrol en die sewe seëls daarvan kan oopmaak.” <sup>6</sup> En ek het tussen die troon en die vier lewende wesens, en tussen die ouderlinge, 'n Lam, soos een wat geslag is, sien staan. Hy het sewe horings en sewe oë gehad – die sewe Geeste van God – wat oor die hele aarde heen uitgestuur is. <sup>7</sup> En Hy het nader gegaan, en die boekrol geneem uit die regterhand van Hom wat op die troon sit. <sup>8</sup> Toe Hy die boekrol neem, het die vier lewende

wesens en die vier-en-twintig ouderlinge voor die Lam neergeval. Elkeen het 'n lier en 'n goue bak vol reukwerk, wat die gebede van die heiliges is, vasgehou. <sup>9</sup> Toe sing hulle 'n nuwe lied: “U is waardig om die boekrol te neem, en die seëls daarvan oop te breek, omdat U geslag is, en met u bloed mense vir God gekoop het, uit elke geslag en taal en volk en nasie. <sup>10</sup> U het hulle 'n koninkryk en priesters vir ons God gemaak, en hulle sal as konings oor die aarde heers.” <sup>11</sup> Toe ek weer kyk, hoor ek die sang van baie engele rondom die troon, en van die lewende wesens en die ouderlinge. Daar was tienduisend maal tienduisende, duisend maal duisende, <sup>12</sup> wat met harde stemme uitroep: “Waardig is die Lam wat geslag is, om die krag en rykdom en wysheid en sterkte en eer en heerlikheid en lof te ontvang.” <sup>13</sup> En ek het die hele skepping – in die hemel, op die aarde en onder die aarde, op die see, en alles wat daarin bestaan – hoor uitroep: “Aan Hom wat op die troon sit, en aan die Lam, kom toe die lof en die eer en die heerlikheid en die sterkte, vir ewig en ewig.” <sup>14</sup> Die vier lewende wesens het ook uitgeroep: “•Amen!” En die ouderlinge het neergeval in aanbidding.

## Aantekeninge

1. Nie die Leeu nie maar die Lam is waardig om die boekrol oop te maak
  1. Die Leeu uit Juda is waardig om die boek met die sewe sels oop te maak. En dan volg 'n verrassingsoomblik wanneer nie 'n Leeu nie, maar 'n Lam verskyn. Die eerste lied beklemtoon die waarheid van die Lam (5:9-10), en die tweede die kruisdood van die Lam, Jesus Christus (5:12).
2. Die boekrol in God se regterhand
  1. Ons sou twee moontlike vertalings vir die Griekse woord biblion kon gee: boek of boekrol. Laasgenoemde was die bekende papiusrol wat van Egiptiese papiusstroke gemaak is. Dié papiusrolle was tot aan die einde van die eerste ee na Christus in algemene gebruik en het vanaf 3000 vC die algemene skryfmateriaal uitgemaak. Die latere kodeks, of boek, is gemaak van gebreide leer (wat perkament genoem is) en het veral vanaf die tweede eeu na Christus gewild geword. Die papiusrol was ongeveer tien meter lank en gewoonlik net aan die een kant volgeskryf. Boekrolle, wat aan albei kante volgeskryf was, was in baie gevalle privaatkontrakte wat verseël was vir die openbare oog. Seëls was klonte klei of was met die stempel van 'n seelring daarop om dit amptelik te maak. Die doel van die verseëling van apokaliptiese geskrifte was om die inhoud geheim te hou tot met die vervulling daarvan (Dan 8:26; 12:9). Dit moes ook pogings van latere vervalsers fruik.
3. Die inhoud van die boekrol
  1. Die meeste vereistes word met die volgende interpretasiemoontlikheid beantwoord::Die boekrol bevat God se toekoms vir hierdie geskiedenis. Dit sluit verlossing en oordeel in. Die seëls wat vanaf Openbaring 6 as deel van God se oordeel beskryf word, is steeds deel van die oopmaak van die boekrol en vorm die voorspel tot die daarop-volgende ontvouing van God se verlossing en oordeel (8:2-22:5). Dit bevat die inwerkingstelling van God se plan, met ander woorde, die boekrol bevat God se "bloudruk" vir wat voorlê, sonder om identies te wees aan die gebeure wat in 6:1-22:5 afspeel. Die voor- en agterkant is volgeskryf, net soos in die geval van 'n kontrak. Die buitekant bevat die opsommende inhoudsopgawe om inligting te verskaf oor die binnekant van die boekrol, maar ook om enige moontlike vervalsing te voorkom. Die sewe seëls beklemtoon die volledige geslotenheid van die inhoud, om eers onthul te word wanneer die seëls een vir een gebreek word, en God se plan ontvou.
4. Wie kan die boekrol opmaak
  1. Daar is iemand wat - op grond van sy optrede - waardig genoeg is om die boekrol oop te maak. Dit is die Leeu uit die stam van Juda (5:5b), die Afstammeling (wortel) van Dawid wat reeds oorwin het. Dié twee treffende beskrywings van Christus kom uit Genesis 49:9 en Jesaja 11:1 (lees ook Jer 11:19; 23:5; 33:15; Sag 3:8). Albei beskryf die Messiaanse (gesalfde) figuur wat die vyand sal oorweldig. Die leeufiguur, wat in antieke geskrifte met koninklike krag en mag geassosieer is, is 'n besonderse beeld van die verwagte Messias Job 10:16; Jes 31:4; Jer 50:44; Hos 5:14). Dié verwagte "koninklike Leeu" word nader gekwalifiseer as uit die stam van Juda en as die Afstammeling (wortel) van Dawid (Op 5:5b).
5. Die fokus van die boodskap in Openbaring 5: 1 - 14
  1. Openbaring 5 vertel van die eskatologie (die leer oor die eindtyd en die einddinge). Dit is die toekoms en uiteinde van hierdie geskiedenis waarvan ons deel is, en wat eers sigbaar kon word toe die Lam wat waardig is die boekrol oopgemaak het. Slegs die Lam van God is waardig om die seëls van die boekrol te breek omdat Hy sy lewe daarvoor gegee het. Hy is die Middelaar op grond van sy kruisdood. Christus se Godheid word sterk beklemtoon, en hoofstuk 5 besing sy Godheid en prys Hom met dieselfde lof en taal as waarmee God ge-prys word. Die Lam as koning én as offerande gee betekenis aan die res van die vertelling. Hoofstuk 5 laat die hemelhof op die aarde grondvat. Die verbindingspunt lê in die soteriologie (die leer oor die verlossing). As gelowiges deel ons ook in die oorwinning wat Christus deur sy kruisdood oor die Satan behaal het. Ons hoef hom nie weer te oorwin nie, maar moet deur ons getuieis sy oorwinning sonder ophou op elke lewensterrein proklameer. Ons neem deel aan 'n verbete stryd, maar weet reeds wat die uitslag gaan wees. Die erediens in die troonsaal sê ook soveel oor ons aanbidding.

*Bron: Jan du Rand, Die A-Z van Openbaring: 'n Allesomvattende perspektief op die boek Openbaring, CUM, Vereeniging, 2007*